

Innarluutillit kiffartuunneqarnerisa ineriertortinnejarnissaanut aamma annertusarnejarnissaanut sulinuteqalernissaq siunertaralugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Peter Poulsen, Siumut)

Oqaaseqaat:

Siumuminngaaniit oqallissaarummik pingaarutilimmik saqqummiisoq inatsisartuni ilaasortaq Hans Peter Poulsen, Siumut qujaffigerusupparput.

Siumuminngaaniit siunnersuuteqartoq isumaqatigilluunnarpalput tassa innarluutillit pillugit suli annerusumik alloriarfissanik tikkuussisariaqalerpugut. Innarluutillit inatsisartut kiisalu kommunimi qinikkat atorfissaqartilluunnarpaatigut. Soorunalimi innarluutilinnut suliaqarneq assigiinngitsut iliuuserisat aallartisaleruttorput soorlu Naalakkersuisut akissuteqarnerminnik kommunit iliuuserisaat taakkartoraat. Taamaakkaluartoq suli inerisaassalluta immitsinnut atorfissaqaqatigiittuassaagut.

Soorunalimi inatsisartut assigiinngitsutigut angalarnerminnik oqaloqateqartarnerminnillu paasissutissanik kommuninut paasiniaasarpalput. Assigiinngitsullu innarluuteqartut atorfissaqartittagaat naammattuugassaasartut nunaqarfinni illoqarfinnillu takuneqartarput oqaatigineqartarlutillu.

Siumuminngaaniit qujanarpoq Naalakkersuisut pilersaarummik kommunimi tamakkiinerusumik akuutitsumik innarluutilinnut atorneqarsinnaasumik pilersitsiniarnerat naammassiartuaartoq, assullu Siumuminngaaniit tamanna qilanaarupparput.

Taamaakkaluartoq siunnersuuteqartup oqariartuuta suli annertunerusumik innarluutilinnut sullissineq inerisarnejarnissa pingaaruteqarluunnarpalput. Ullutsinni innarluutillit kattussinnaanerat assersuutigalugu kujataani angalanermi tusagarput paasisarpullu pitsaanngitsoq oqaatigilaassuara. Sulisut oqarneratuut takorluuisaraluqaagut sullitatsinnik angallammik aasakkut angalaartitsinissatsinnik, nuannersorujussuarmik takorloortaraluqaarput, kisiannili takorluugarput piviusup inorsartittarpaatigut pissutsit ajornarisittuartarmassuk. Tassa angallanniarnikkut pissutsit sullitatta atorfissaqartitaanut inorsaattuartuusarmata.

Assersuut alla: Innarluutillit pisinnaanerusut pulaarnikuusarpalput inissiamik ineqartinneqarput qaleriinnik marlunni. Inigisaat naleqqussarnejarsimangilaq innarluutilinnut. Atortuutigineqartut sikavimmiittut ineqartup inorpai ikiorteqartinnani, inigisaat inunnut nalinginnarnut sanaajummat, soorunami inuttanngua ilungersortaraluqaqili. Ukiunilu arlaqartuni inigisamini ineqarsimavoq, ajornerpaavorlu ikuallattoqassagaluarpat qimaaffissiaqanngilaq rullestoole-rami, igalaakkulluunniit periarfissaqartinneqanngilaq qimaaffigineqarsinnaasumik. Ineqartut aappanngua oqaluttuarpoq majuartarfikkut rullestoole-qarami ammukarluni ikiorteqannginnami nakkakattarsimalluni sivisoorujussuarmik orninnejarsimangilaq, nillialluni sivisoorujussuarmik aatsaat ikioriartorneqarsimavoq.

Assersuutit taakkua takutippaat suli innarluutillit pitsaanerujussuarmik pitsangorsaaffigineqarnissaat sulissutigisariaqaripput. Angallanniarneq tamakkiinerusumik atorneqarsinnaasunngortinnissaa ujartorneqartariaqarpoq, ineqarniarneq innarluutilinnut tulluarsagaanerusut pilersinneqartariaqarput.

Siunnersuuteqartup taakkartugai inuinnaat ornittagaani orninneqarsinnaasut soorunalimi innarluutilinnut orninneqarsinnaasunngorlugit pitsangortinneqarnissaannik Siumuminngaaniit isumaqataalluinnarpugut. Allatuulli ilumoortumik innarluutillit uagutsitut naleqarmata.

Siumuminngaaniit aamma soorunalimi suliffeqarfiiit pisiniarfiit ilaallu innarluutilinnut sulisoqarnissaminnik suleqataalluartunut qujassuteqarusuppugut.

Siunnersuuteqartup oqaatigivaa innarluuteqartut kattussinnaanissaannut periarfissanik nunatsinni amigaateqartoq. Tamanna Siuminngaaniit paasilluarsinnaavarput aammami nunatta isorartunersua eqqarsaatigalugu periarfissarititaasut killerlersortutullu isippaatigut. Naalakkersuisut eqqaavaat Sisimiuni piusoq Pisassarfik nutaaliaq innarluutilinnut assigiingngitsutigut inerisaanermik periarfissiisinhaalluartoq. Tassa ilumoopoq pissassarfiup pisinnaasai sulisoqarnikkut pitsasumik piuvoq. Soorunalimi taanna Pisassarfik piugaluartoq tamakkiisumik aamma atorneqarsinnaanera pissutsit nunatsinni ajornartittarpaat. Taamaammat aamma Siumuminngaaniit kaammattorusunnarput Pisassarfiup pitsaanerusumik atorneqarsinnaanera anguniarlugu timmisartukkut angallanneq suleqatigiifflusumik neqeroorutinik pitsaanernik suliaqartoqarsinnaanissaanik anguniagaqartoqarsinnaasariaqartoq.

Kiisalu Siumuminngaaniit inuinnaat iserfigisinnaasaat innarluutilinnut iserfigineqarsinnaanissaannik suliaqartoqarnissaanik kaammattueqqissaagut oqareernittut innartuutillit aamma allatuulli naleqartinneqarmata.

Siumut siuttuunermini innarluutillit pillugit annertuumik ilungersuuteqarnikuovoq, taamaakkaluartoq aammaarluta inerisaqqinnissatsinnut oqallinnissamik peqataajuassaagut. Uanilu aamma eqqaarusupparput innarluutilinnut akisussaaffimmik kommuninut tunniussinikuugatta. Tamannalu aamma massakkut eqqartorluaqqittariaqartoq isumaqarpugut.

Taamatut oqaaseqarluta una oqallinneq angusaqarfiulluarumaartoq Siumumiik neriuutigaarput.

Mala Høy Kúko, Siumut